

Efesios

Jacheuayama

1 ¹ Atše Pablo, Jesucristbe ichmoná Bèngbe Bètsá chca yobóšeyeca, quem tsbuanácha sèntsabiamná Efeso puebloca Bèngbe Bètsabe entšanga y Cristo Jesúsbeñe ošbuáchiyènga imomnèngbiamá. ² Atše séntseimpadana Bèngbe Bètsá Bèngbe Taitá y Bèngbe Utabná Jesucristo, chaboma tsèngaftangbeñe tsabe bendicionènga chaotsemnana, y chata chaboma tsèngaftangbe ainaniñe tsabe ebionana chašmotsebmomnana.

Crístoftaca cányiñe mo canyáca jtsemnèse, bènga mochántsebmomna nyetsca tsabe soyènga, ntšamo celoca yobinýncá

³ Bèngbe Bètsá y Bèngbe Utabná Jesucristbe Taitábioye mochjètschuaye, er bènga Crístoftaca cányiñe mo canyáca mondménayeca, Bèngbe Bètsá tojama bènga nyetsca tsabe soyènga chamotsebmomnana, ntšamo celoca yobinýncá. ⁴ Bèngbe Bètsá bènga šojanabacacá Crístoftaca cányiñe mo canyáca chamotsemnana, cabá quem luare cha ndama orscana, bènga chabe delante chamotsemnana chabe entšanga, bacna soyèngama perdonánènga y chabe oservénènga, y bènga ainaniñe bacna soye ndbomnènga imomna ca cha cháuyanama. ⁵ Bèngbe Bètsá šuababuánjeshanayeca, tempo

cha tojanjuabó y tojánbošena bènga mo cachabe basengcá jábiamama, chë Jesucristo yochjanma sóyeca. ⁶ Chíyeca bènga Bèngbe Bètsábioye sempre jtsatschuanayana, cha bèngbe tsábiamá juabna yobómnyayeca, ndayá chabe Bonshana Uaquiñáftaca bèngbe tsábiamá cha tojamama. ⁷ Bèngbe Bètsá puerte bonshanánaca bèngbe tsábiamá bètscá yojuabnáyeca, cha bèngbe bacna soyèngama šojtsaperdoná y šojatsebacá, er Jesús bèngbiamá tojanóbana, chabe buiñe juabuáshanèse. ⁸ Bèngbe Bètsá tojama bènga nyets osertánana y becá juabna chamotsebmomnana, cha becá bonshanánaca bèngbe tsábiamá juabna yobómnyayeca, ⁹ y tojama bènga chamotsetatšèmbuama ndayá jamama cha yobošcá, ndayá cachá tempscana yojanjuabná jamama, pero entšanga chca ndoñe tonjaninýanjé. Ndayá jamama Bèngbe Bètsá tempo yojanjuabnacá, ndayá cha tojama bènga chamotsetatšèmbuama, cachá yojanjuabná chca jamama. ¹⁰ Ndayá jamama Bèngbe Bètsá yojuabnacá, lempe echanjochnèngo nya chama tempo chaojóshjango ora, y quem Bèngbe Bètsabe juabna endmèna jamana, lempe ntšamo cha tojamcá celoca y quem luarentše, Cristo chamotsebmomna nyetsca chë soyènguiñe

¹¹ Bèngbe Bètsá sempre jamana nyetsca soyènga ntšamo

tojtsejuabnacá y tojtsebošcá. Y Bèngbe Bètsá bènga šojabacacá, ntšamo cabá chca ndama ora yojanjuabnacá; chca, bènga Crístoftaca cánýiñe mo canýacá jtsemnëse, bènga chamóyëngacñama ndayá Bèngbe Bètsá chabe entšanga jatšatayama tojašebuachená, mo chèngbe otocana soycá. ¹²Y Bèngbe Bètsá chca tojama, bènga chë Crístbeñe natsana imojtsanošbuachenga, cha bènga šochjánatsebacama, tšabe soyënga jtšamëse chamotsiyenama, chca, chë inye entšanga Bèngbe Bètsabe obenanama cha chamotsatschuanama. ¹³Y tšëngaftángnaca, chë ndegombre buayenánana šmojanuena ora, chë Bèngbe Bètsá bènga játsebacama buayenánana, y Crístbeñe šmojtsanošbuaché ora, Bèngbe Bètsá tojanma tšëngaftanga Crístoftaca cánýiñe mo canýacá chašmotsemnama y tcmojanainýnaná tšëngaftanga chabe entšanga bétsemnama. Bèngbe Bètsá chca tojanma, Uámana Espíritu tšëngaftangbe ainaniñe cháuamashënguama tojanma ora, ntšamo tempo cha tojanašebuachenacá. ¹⁴Bènga chë Uámana Espíritu bèngbe ainaniñe mondbómnyeyeca, corente mondetátšëmbo ndayá Bèngbe Bètsá chabe entšanga tojašebuachenacá bènga mochjójëngacñama. Uámana Espíritbeyeca bènga montsobena chca puerte tšabá jtsetatšëmbuama, chë Bèngbe Bètsá chabe entšanga nyetsca tescama játsebacama y ntšamo tojašebuachenacá jatšatayama tempo chaóshjanguëntscuana; y lempe ntšamo cha bèngbiana inétsamama, nyetscanga cha mochántatschuanaye, cha bètsá y obená bétsemnama.

**Pablo Bèngbe Bètsábioye
tbojanimpadá, ošbuáchiyënga
osertánana chamotsebomnama.**

¹⁵⁻¹⁶Chcáyeca, atšna, Bèngbe Bètsá tšëngaftangbiana stseimpadana ora, sempre cha sèndbètsatschuanaye, er atše sènjátatšëmbona ntšamo tšëngaftanga Bèngbe Utabná Jesúsbeñe tša šmojtsošbuáchema, y ntšamo tšëngaftanga nyetsca chë Bèngbe Bètsábenga imomnënga šmababuánýeshanama. ¹⁷Bèngbe Bètsá, Bèngbe Utabná Jesucristbe Taitá, nda corente iuámana, séntseimpadana cha chaoma Uámana Espíritu chacméjabuachama, corente osertánënga chašmotsemnama, y chacminýanyé nda Bèngbe Bètsá yomnana, chca, más tšabá cha chašmotsábuatmama. ¹⁸Atše, Bèngbe Bètsá séntseimpadana, cha chaoma tšëngaftanga Bèngbe Bètsabe soyënguiñe corente osertánana chašmotsebomnama, tšëngaftanga chašmotsetatšëmbuama, ndayá Bèngbe Bètsábeñe jtsošbuáchiyëse tšëngaftanga šmojtsobatmancá cha cmochjátšatayama. Bèngbe Bètsá tcmojáchembo chábeñe chca chašmotsobátmanama. Atše cha séntseimpadana, chaoma tšëngaftángnaca chašmotsetátšëmbo tša bètscá y bèts soyënga yomna ndayá chabe entšanga cha tojašebuachenacá; ¹⁹y chašmotsetátšëmbo tša bèts soye y ndocna te ntjéftsoPOCHÓCAMA chabe obenana yomnana, chë ndayá bèngbe ainaniñe tšabe soyënga yojtsama, bènga chë Crístbeñe ošbuachiyëngbeñe. Cach quem puerte bèts obenana endmëna, ²⁰ndáyeca Bèngbe Bètsá tojanma Cristo cháuatayenama, y chabe catšbioica celoca tbojtantbema chaotsemándama. ²¹Choca Cristo

nÿetsca soyënguïñe yojtsemánda, y más bëtscá obenana y mando yojtsebomna nÿetsca mándayëngbiana, chë mando y obenana bomnëngbiana, y cha yomna más uamaná y bëtsá nÿetsca chë entšangbiana mo bëtsëtsangcá utabnëngbiana, chëngbe uabaina respétoca jtsichámëse. Cristo puerte bëtsá endmëna lempe ntšamo quem luarentšë yobínÿnama y Cristo yochjésabentšana yochtsebinÿárnacna. ²² Bëngbe Bëtsá tojama Cristo nÿetsca soyënguïñe chaotsemándama, y tbojanábuayana nÿetsca soyënguïñe chaotsemándama, chábeñe ošbuáchiyëngbe tšabiana. ²³ Cha endmëna nÿetsca chábeñe ošbuáchiyëngbe mandayá, y chënga mondmëna mo cachabe cuerpo cuaftsemncá. Chëngbe ainaniñe cha endoyena y nÿetsca luarënguïñnaca, y lempe cha endëmánda.

Atsebácanënga mondmëna, Bëngbe Bëtsá šuababuánÿeshanayeca

2 ¹ Tempo tšëngaftanga Bëngbe Bëtsabiana mo obanëngcá šmonjamna, er tšëngaftanga šmonjaniyena, ntšamo Bëngbe Bëtsá yomandacá ntsamcá, y bëtscá bacna soyënga šmojánama. ² Chca, tšëngaftanga šmonjánama mo chë nÿe quem luarama enójuabnayënga monduamancá, y šmonjanëyeunana Satanás, chë bacna espíritënga obenana bomnënga y quem luarentša tsbanánoca imomnëngbe amëndayá, chë Bëngbe Bëtsábioye ndëyeunanëngbe ainaniñe yománda espíritu. ³ Tempo bënga nÿetscanga fsënjaniyena ntšamo tšëngaftanga šmonjaniyencá. Bënga soyënga fsënjánama, nÿe ntšamo ftsjanbošcá nÿe bëngbe cuerpëngbe tšabiana, y nÿe ntšamo bëngbe juabna enjamncá

bacna soyënga jamama. Bënga fsënjaniyena soyënga jtsamëse mo chë Bëngbe Bëtsábioye nduabuatma entšanga mondbetsamcá; chë causa bënga fsënjanomerecena jtsebomnana chë Bëngbe Bëtsabe uabouana castigo, cachcá chë Bëngbe Bëtsábioye nduabuatmëngcá. ⁴ Pero Bëngbe Bëtsá sempre tša lastemado entšangbiana endmëna y sempre corente bënga šondábabuanÿeshana; ⁵ y chíyeca, bënga cabá mo obanëngcá chabiana fsënjamna ora, bacna soyënga fsënjánama causa, chora cha tojanma bënga tšabe vida chamotsebomnana y Crístoftaca cánÿiñe mo canÿacá chamotsemnana. Bëngbe Bëtsá tšëngaftangbe tšabiana juabna bómnayeca, bacna soyënguentsana tcmojatsebacá. ⁶ Bënga Jesucrístoftaca cánÿiñe mo canÿacá bëtsemnayeca, Cristo Jesús cháuatayenama Bëngbe Bëtsá tojanma ora y celoca tbojtantbema ora, enjamna mo béngnaca chámuatayenama Bëngbe Bëtsá cuafjamcá y Cristo Jesúseftaca celoca cuafatbiamcá. ⁷ Chca enjamna, Bëngbe Bëtsá entšanga cháuinÿanÿema nÿetsca joshjanguama tempënguïñe, ntšamo cha bëngbe tšabiana bëtscá juabna bëtsebomnana, cha Cristo Jesúseftaca béngbioye tšabe juábna šojánanÿe ora. ⁸ Er Bëngbe Bëtsá tšëngaftangbiana tšabe juabna yojánbomnayeca, tcmojatsebacá, Jesucrístbeñe šmojtsanošbuáchemá; pero atsebácanënga šmondmëna, ndoñe cach tšëngaftanga ndayá šmojánmayeca, ndayá atsbočaná jtsemnana endmëna Bëngbe Bëtsabe canÿe tšëtana soye. ⁹ Atsebácanënga šmondmëna, ndoñe cach tšëngaftanga ndayá šmojánmayeca; chíyeca ndocná quenátobena jtsenábotamnayana atsbočaná yojtsemnana. ¹⁰ Bëngbe

Bëtsá šojtabiama ntšamo bënga mondmëncá, y Cristo Jesúseftaca cányĩne mo canyácá bëtsemnayeca, Bëngbe Bëtsá mo tsmëma entšangcá cuaftsatsmëncá šojtabiama, tšabe soyënga jtsamëse jtsiyenama. Y ndayá bënga tšabá mondamcá, Bëngbe Bëtsá tempo tojanprontá bënga chamotsamama.

Cristbeyeca tempcá tšabá Bëngbe Bëtsáftaca jtsatsmënana

¹¹ Tšëngaftanga ndoñe judiënga, ndëmuanyënga judiënga cmondubuatma “chë más delicadentšë base bobachtema ndëtëtšënenëga ca”, chëngcá uinynanánënga ndoñe šmondmënama; chënga cachënga jtsenábobuatmana “chë más delicadentšë base bobachtema tëtšënenëga ca”, y cachëngbe cuerpënguĩne chca jtsamana. Mëntšá, tšëngaftanga chë ndoñe judiënga, ¹² šmochjenójuaboye ntšamo tempo šmojamnama, Crístbeñe cabá ndošbuáchiye ora. Chora, tšëngaftanga Cristo ndoñe šmonjánbomna, Israeloca entšangbiana stëtšoye šmonjanquedana, y ndoñe šmonjantátšëmbo lempe ntšamo Bëngbe Bëtsá chabe entšanga tojanašebuachenacá. Tšëngaftanga quem luarentšë šmonjaniyena ndocnábeñe ntsobatmancá y Bëngbe Bëtsá ntsabuatmcá. ¹³ Pero mora tšëngaftanga Cristo Jesúseftaca cányĩne mo canyácá šmontsemna, chë tempo Bëngbe Bëtsá ndoñe šmonjanábuatmënga, y cha tojama chábioye chašmotsábuatmama; y chca yomna, er Jesús, chabe buĩne juabuáshanëse, tšëngaftangbiana tojanóbana. ¹⁴ Cach Cristo yojtsama bënga tempcá tšabá Bëngbe Bëtsáftaca chamotsemnama. Cha tojama judiënga

y ndoñe judiënga nyëtscanga mo cachca entšangcá chamotsemnama, mo nda canyë tapiëše tojtsendbemcá, chë ndayëšëca canyë luarentša entšanga tmojtsenjáta, chënga enáyaye causa. ¹⁵ Cristo chënga mo cachca entšangcá tojábiana, judiëngbe leyënga y mandënga ndocna obenana chamondëtšëbomnama jamëse. Chca tojama, cha jóbanëse, chë útoica entšanga mo nye canyë tsmëma entšangcá jábiamama, cháftaca cányĩne mo canyácá jtsemnëse. Cha chca tojanma chënga nyëtscanga tšabá chamotsiyenama; ¹⁶ y Cristo cruciñe tojanóbanayeca, cha tojanma chë útoica entšanga enáyayana chamotsajbanama, y tojanma chë útoica entšanga mo canyë entšangcá chamotsemnama, chënga tempcá tšabá Bëngbe Bëtsáftaca chamotsatsmënama.

¹⁷ Cristo quem luaroye tojánabo tšabe noticiënga jabábuayenama, tempcá tšabá Bëngbe Bëtsáftaca jtsatsmënama. Cha quem tšabe noticiënga tojanabuayená tšëngaftanga chë ndoñe judiëngbioye, chë Bëngbe Bëtsá ndoñe šmonjanábuatmënga, y chë judiëngbioynaca, chë Bëngbe Bëtsá imojanábuatmënga. ¹⁸ Er chábeyeca, canyányënga y ínÿënga montsobena chë Taitábioye jobéconana, er bënga nyëtscanga cachca espíritu bëngbe ainaniñe mondbomna, chë Uámana Espíritu. ¹⁹ Chíyëca tšëngaftanga, Bëngbe Bëtsabe entšanguentšë ndoñe quešmátsmëna mo inyë luarocana ashjajnëngcá, y ni mo cachëngbe yebnentšë ndoyenëngcá, tondayama derecho ndbomnënga. Inyëtšá endmëna; tšëngaftanga derecho šmondmëna cachcá ntšamo Bëngbe Bëtsabe entšanga mondbomncá, y Bëngbe Bëtsabe básënga šmondmëna. ²⁰ Jesucristo

y chabe entsanga mondmëna mo canÿe jebna yebncá. Jesucristbe ichmónënga y chë Bëngbe Bëtsabe juabna oyebuambnayënga mondmëna mo chë ndëtsbënga ndayinë chë yebna tojtsëcuatjoncá; tšëngaftanga ošbuáchiyënga šmondmëna chë jebna yebnentša soyëngcá, y cach Jesucristo mo chë más uámana luarentše uashacuana ndëtsbecá. ²¹ Quem más uámana luarentše uashacuana ndëtsbeñe, nyetsca chë bëts yebnentša soyënga jtsëcuatjonana, y tsbanánoye más tmojatsjebëse, chë bëts yebnentše tsëm jebna sóynaca chiñe jtsëcuatjonana. Cachcá Cristo, mo chë más uámana luarentše uashacuana ndëtsbecá, jtsamana nyetsca chábeñe ošbuáchiyënga cháftaca cánÿiñe mo canÿacá chamotsemnana, y ínÿëngnaca cachcá chamotsemnana. Y nyetsca ošbuáchiyënga Crístoftaca cánÿiñe mo canÿacá tmojtsemna ora, chënga jtsemnana mo Bëngbe Utabnabiama canÿe bëts yebna jebncá, chábioye jtsatschuanayama. ²² Y tšëngaftanga Efesoca ošbuachiyëngbiámnaca Cristo entsama, chë inÿe chábeñe ošbuáchiyëngaftaca mo canÿe entsangcá chašmotsemnana. Y chë Uámana Espírítu bëngbe ainaniñe yojtsiyénayeca, bënga nyetscanga cánÿiñe mondmëna, mo canÿe bëts yebncá ndayentše Bëngbe Bëtsá soyena.

**Pablo Jesucristbe trabajo
yojanbonÿena, chë ndoñe
judiëngbeñe jamama**

3 ¹ Chca, atše Pablo utamená séntsemna, Cristo Jesusbiama soyënga entsanga abuyiynaye causa, tšëngaftanga chë ndoñe judiëngbe tšabiama. ² Er tšëngaftanga ya cmontsamna jtsetatšëmbuama,

Bëngbe Bëtsá tšëngaftangbe tšabiama juabna yobomnama; y chca, chë trabajo atše šojabonyé, tšëngaftangbe tšabiama jamama. ³ Tšëngaftángnaca cmontsamna jtsetatšëmbuama ndayá Bëngbe Bëtsá šojinÿinyé, ntšamo cha jamama tempo tojanjuabocá, pero entsanga chca ndoñe tonjaninÿanyé, y chë soyama ya batsatema tcbonjubuábiamá. ⁴ Chašmojualiá ora, šmochanjátatšëmbona Cristbe soyënga šosertánama, chë tempo ndocná yonjanábuatma soyënga, ⁵ chë tempo Bëngbe Bëtsá ndocnábioye tbonjaninÿinyé soyënga; pero mora cha tojinÿanyé, Jesucristbe ichmónënga nÿe Bëngbe Bëtsabiama oservénëngbioye y Bëngbe Bëtsabe juabna oyebuambnayëngbioye; y cha chca tojama chabe Uámana Espírítuftaca. ⁶ Ndayá tempo Bëngbe Bëtsá ndoñe tonjaninÿanyecá mëntšá endmëna: chë ndoñe judiënga Jesucristbe tšabe noticiënguñe chamojtsošbuaché ora, cachcá ntšamo chë judiënga ošbuáchiyënga Bëngbe Bëtsábiocana mochjoshachiñcá, chëngnaca chábiocana mo otocancá chë soye mochanjóyëngacñe. Chënga mo cach judiënga ošbuachiyëngcá, Cristo mondbomna mo chëngbe mandayacá. Y chca Cristo endmëna mo bestšašcá y chënga nyetscanga mondmëna mo cachabe cuerpentša soyëngcá. Chë ndoñe judiënga ošbuáchiyënga mochanjóyëngacñe lempe ntšamo Bëngbe Bëtsá chë judiënga ošbuáchiyënga tojašebuachenacá. Chca echántsemna chë ndoñe judiëngaftaca, chënga Cristo Jesúseftaca cánÿiñe mo canÿacá bëtsemnayeca.

⁷ Masque ndoñe šonjanomerecena, mo ndayá cuafjatšetacá, Bëngbe Bëtsá šonjanábuayana cha jtseservénama,

tšabe noticiënga entšanga jtsabuayinyayëse; y cha átseftaca chca tojanma chabe obenánaca. ⁸ Atše nyetsca chë Bëngbe Bëtsabe entšanguentše sëndmëna chë más nduamaná; pero Bëngbe Bëtsá bëts pavor šontsebema, šonjalesenciá chë Cristbe bëts cá tšabe soyënga chë ndoñe judiënga jábuayenama. Chë Cristbe soyënga tša bëts cá endmëna, y chca, quenátopodena chë soyënguentsana lempe jtsabuatmana. ⁹ Y chë trabajo šonjabonýé jamama, nyetscanga botamana jinýama chamotsobenama ndayá Bëngbe Bëtsá yochjama, ndayá cachá, chë nyetsca soyënga tojamá, tempscana yojanjuabnacá. Méntscónama Bëngbe Bëtsá chë soye ndocnábioye tbonjinýinýé, pero mora afñe. ¹⁰ Chca, Cristbeñe ošbuachiyëngbeyeca, mora chë celoca mándayënga y obenana bomnënga, chamobená juabuátmanana nyets osertánana ntšamo Bëngbe Bëtsá yobomncá. ¹¹ Bëngbe Bëtsá chca tojama, ntšamo cachá yojanjuabnacá nyetsca tescama jamama, y chca cha tojama Jesucristoftaca, Bëngbe Utabná. ¹² Bënga Crístoftaca cányñe mo canýacá mondmëna, y chábeñe mondošbuachéyeca, bënga montsobena Bëngbe Bëtsábioye jobéconama tondayama ntjatauatjácá, y corente jtsetatšëmbëse cha ndoñe chašondubatemala. ¹³ Chýyeca atše cbontsaimpadana ndoñe chašmondëtsajbaná ainaniñe añemo bomnana, atše séntsesufrina causa, er chë tšëngaftangbe tšabiama tsësufrintentsana, tšëngaftangbiama tšabe soyënga endóbocana.

Cristbe bonshánana

¹⁴⁻¹⁵ Y chca, Bëngbe Bëtsá, chë Taitá, ndábentsana nyetsca

pamíllanga celoca y quem luarentše uabaina imóyëngacañe, chabe delante joshaméntšase, ¹⁶ séntseimpadana, chabe bëts cá uámana bomnánaca chaoma, tšëngaftanga ainaniñe obenana y bëts añemo chašmotsebomnana, chabe Espiritbeyeca, ¹⁷ y tšëngaftanga Cristbeñe jtsošbuáchiyëse, mua tšëngaftangbe ainaniñe chaotsiyenama. Bëngbe Bëtsánaca séntseimpadana, cha y inýenga nyets ainánaca jtsababuánýeshanëse, ¹⁸ tšëngaftanga y nyetsca Bëngbe Bëtsabe entšángnaca tšëngaftangaftaca, chašmotsobena josértama Cristbe bonshánana bëngbiama tša bëts cá yomnana. Nderado nda tojontsé chabe bonshánana jatšëmbonana mo canýe soye cuaftsemncá, cha ndocna te nanjobenaye jtsetatšëmbuana tëntšoye ndayéntscoca yomna y nyanëjoye ndayéntscoca, jashenoye ndayéntsoñe y tsbanánoye ndayéntsoñe yomna. ¹⁹ Atše séntseimpadana tšëngaftanga chašmobená chë bonshánana juabuátmanana (chë bonshánana puerte bëts cá endmëna causa, bënga ndocna te quemochatobenaye josértama ntšamo chë soye lempe yomnana). Pero séntseboše, tšëngaftangbe ainaniñe nyë Bëngbe Bëtsabe soyënga chaotsemna y tšëngaftanga chašmotsiyena jtsamëse, ntšamo tšëngaftanga chašmotsamama Bëngbe Bëtsá yojuabnacá.

²⁰ Y mora, nyetscanga Bëngbe Bëtsá chamotsatschuaná. Cha obenana yobomna ntšamo bënga tmojtsotjanañe o tmojtsujuabnama más soyënga jamama, chabe puerte bëts obenánaca; y chë obenana bëngbe ainaniñe yojtsemándá y yojtsama bënga ainaniñe sempre ošbuáchiyana chamotsebomnana. ²¹ ¡Entšanga

Bëngbe Bëtsá chamotsatschuaná nyets tempo y nyetsca tescama, ndayá Crístbeñe ošbuáchiyënga tmojtsamama y cach Cristo tojamámnaca! Chca chaotsemna.

Uámana Espíritbeyeca bënga cányiñe mo canyáca jtsemnana

4 ¹As, atše chë cárceloye utamená, Bëngbe Utabnabiamá trabájaye causa, tšëngaftanga cbontsaimpadana, ndëmuanýënga Bëngbe Bëtsá tcmojáchembo chabe entšanga chašmotsemnana, sempre chašmotsiyena mo chë entšangcá ndëmuanýënga Bëngbe Bëtsá cach soyama tojánachembo y chca imomerecena. ²Cada ona chamotsenojuabná mo chë ínýënga chabiamá más uámanënga tmojtsemncá, y nyetscángbiöyë puerte bonshánanaca šmochtsobátmana, y bëtscá bonshánana jtsebonnëse šmochtsenëuantana; ³sempre šmochtsejuabnaye y šmochtsentšëna tšëngaftanga nyets tempo cányiñe mo canyáca chašmotsemnana, nyetsca tšëngaftanga natjëmbana jtsemnëse. Y tšëngaftanga šmontsobëna cányiñe mo canyáca jtsemnana chë Uámana Espíritbeyeca. ⁴Bënga Jesucristbeñe ošbuáchiyënga bëtsemnayeca mondmëna mo cach cuerpentšëngcá, chë Cristbe cuerpo, y cachca Espiritu bënga nyetscanga ainaniñe mondbomna. Bëngbe Bëtsá šojáchembo, bënga chábeñe jtšošbuáchiyëse, nyetscanga cachcá šochjátšatayama chamotsobátmanama. ⁵Bënga nyetscanga cach Utabná mondbomna, cachca ošbuáchiyana Jesucristbeñe mondbomna, y bënga nyetscanga uabáinënga mondmëna chca betsošbuáchiyama. ⁶Bënga ošbuáchiyënga nyetscangbiama cach

Bëngbe Bëtsá y Taitá endmëna. Cha bëngbe amëndayá endmëna, chabe obenana nyetscángbeñe jtsinýnana, y nyetsca bëngbe ainaniñe chabe Espiritu endmëna.

⁷Pero bënga, cada ona tšetana obenana tojóyëngacñe, tšabe soyënga jamama, ntšamo Cristo jatšatayama tojanbošencá, chábeñe ošbuáchiyënga jujabuáchama. ⁸Chíyeca, Bëngbe Bëtsabe uabemana palabrënguñe Jesucristbiamá mëntšá endayana:

Cha celoye tontantsjuá, y cháftaca tonjanéyamba nyetsca chabe uayyënga, chë tojánayëñjananga, y chabe entšángbiöyë obenana tonjanatšatá, tšabe soyënga jamama ca.

⁹¿Y ndayá yojtsayana chë “cha tontantsjuá ca”? Chca entsayana co Cristo natsana, quem luaroye tojánastjango ca. ¹⁰Y Cristo, chë tojanastjanguá, cachá endmëna nda celoca chë más tsbanánoyë tojtantsjuá; chca, canyë ora nyëtscañe cha chaotsemnana. ¹¹Y cachá, chë tšabe soyënga jamama obenana tojanatšatá ora, tojanma chábeñe ošbuáchiyënguentšë chamotsemna ínýengna chabe ichmónënga, ínýengna Bëngbe Bëtsabe juabna oyebuambnayënga, ínýengna tšabe noticiënga Cristbiamá abuayiyayënga, y ínýengna ošbuáchiyënga anyënënga y Bëngbe Bëtsabe soyëngama abuátambayënga. ¹²Cristo tojanabacacangna chabe entšángbiöyë mochjanëjabuache, cha tojanabanýë trabajo chënga chamotsamama, y nyetsca ošbuáchiyënga, chë nyetscanga cányiñe mondmëna mo Cristbe cuerpcá, cada te más ošbuáchiyana y bonshánana chamotsebonnana, ¹³bënga

nÿetscanga chamobenantscuana cachca ošbuáchiyana Jesucristbeñe jtsebmomna, y Bëngbe Bëtsabe Uaquiñabiana nÿetscanga lempe cachcá jtsetatšëmbuama. Chca, bënga mochanjashjache jtsemnama lempe ntšamo Cristo yomncá, mo bëtsëtsanga bëtscá juabna bomnëngcá, ¹⁴ y ndoñe nÿe mo basengcá, Bëngbe Bëtsabe soyëngama jtsetatšëmbuama. Chë soyënguiñe ya ndoñe más nÿe mo basengcá quemochátsmëna, ndëmuanyënga paselo jáingñama yomna. Mo canÿe barquësha nÿe ndaye bínÿiacnaca tojtsëyambancá, básefta entšanga nÿe ndaye buatëmbana soye tmojatuená jatsyeunanana; bënga ndoñe chca quemochátsmëna, ya ndoñe más bëngbe juabna quemochatstróca, nÿe ndaye tmojatuenta tsëm sóyeca, ínÿengbioye áingñayënga. Chënga becá montsetátšëmbo ntšamo entšanga jáingñana, y montseboše chë montsabuatambá bostero soyënga bënga jtseyeunanama. ¹⁵ Chamna, chë Bëngbe Bëtsabe ndegombre soyëngama bonshanánaca jtsóyebuamnyëse, šontsamna jashjáchana jtsemnama lempe ntšamo Cristo yomncá. Cha bëngbe amëndayá endmëna, cachcá ntšamo bestšaše chë cuerpentša soyënga jtsemadayancá. ¹⁶ Mo canÿe bestšašcá, chëše jamana nÿetsca chë cuerpentša soyënga ndayentše chamueneñjama y chiñe jobónjuama chamotsobenama, chë cuerpo saná chaotsebmomna jtsamëse, chca, nÿets cuerpo tsábá chaóbochema, cachcá Cristo, chë nÿetsca ošbuáchiyëngbe amëndayá, chabe obenánaca jamana chënga cada te más ošbuáchiyana y bonshánana chamotsebmomna. Cada cuerpentša soye tojtsama ntšamo chë soye chaotsamama tomncá, as

nÿets cuerpo tsábá jobóchana; cachcá, ošbuáchiyënguentše cada ona tojtsama ntšamo jamama tbojtsemncá, as nÿetsca ošbuáchiyënga cada te más ošbuáchiyana mochántsebmomna, puerte jtsebmomnshánëse.

Cristoftaca cánÿiñe mo canÿacá jtsemnëse tsëm vida šmochtsebmomna

¹⁷ Mëntšá entsemna ntšamo cbontsëtsëtsnacá, y Bëngbe Utabná endmëna nda tojama atše mando chaitsebmomna tsëngaftanga chca jáuyanama: Ndoñe más šmattsiyena bacna soyënga jtsamëse, mo chë Bëngbe Bëtsábioye nduabuátmënga mondbetsamcá; chënga jtsiyenana jtsamëse ntšamo cachëngbe ndoservena juabnënga tojtsamëndacá.

¹⁸ Chëngbe juabnoca obenana mondbomna nÿe ndoñe ndegombre soyëngama josértama. Chënga ndoñe quemátsbmomna chë Bëngbe Bëtsábiocana yóbocana tsábe vida, er chënga ndoñe quematsleséncia chë Bëngbe Bëtsabe soyënga chëngbe ainaniñe chaómashënguama; y chca endmëna, er chënga tmojajuabó y tmojama chë Bëngbe Bëtsabe buayenana soye chëngbe ainaniñe tondaye chaondómashënguama.

¹⁹ Chënga bacna soyënga tmojtsama ora, tondayama ntsenócochinÿenana; chënga nÿets tempo jesentšënanana nÿetsca bacna soyënga amana, y chca jtsamana tondayama ntjatenojwabnycá.

²⁰ Pero chca ndoñe quenjatsmëna ntšamo tsëngaftanga Cristbe soyëngama šmojanatsjinÿe y ntšamo chábioye šmojanabuatmancá.

²¹ Ndegombre tsëngaftanga chabiana šmojanuena y ínÿenga tmojanabuatambá mo chábeñe

ošbuachiyëngcá y ntšamo chë ndegombre soyënga Jesucristbeñe endbinÿncá. ²² Chcasna, ntšamo tšëngaftanga šmojanjuabná, šmojansentina y šmojanamcá Jesucristbeñe cabá ndošbuachená ora, mora lempe stëtsoye šmochjaquéda; ntšamo tempo tšëngaftanga šmojanjuabná, šmojansentina y šmojanamcá, canÿe ondbiamnaye juabnentšana vojóbocana, tšëngaftanga bacna soyëngama juabnéngaca mandánënga jtsemnëse, y chë juabnénga tšëngaftangbioye cmojánaingñaye. ²³ Tšëngaftanga cmontsamna tšëngaftangbe juabniñe tsëm y tšabe juabnénga jtsebmnnana. ²⁴ Tšëngaftanga cmontsamna jashjáchana mo tsmëma entsangcá jtsemnana, y chë ntšamo tempo šmojanamcá mora ndoñe cachcá chašmondétsamama. Chca, tšëngaftanga šmochanjashjache jtsemnana ntšamo Bëngbe Bëtsá yomncá. Bëngbe Bëtsá chca tsmëma entsangcá tcmojábiana, tšëngaftanga chašmotsiyenama jtsamëse Bëngbe Bëtsabe bominÿiñe tšabá yomna soyënga y chábioye jadórana soyënga, chë ndegombre soyënguentšana óbocana soyënga.

²⁵ Chcasna, ya ndoñe más šmattsebostero, ndayá cada ona cháuyana ndegombre soyënga cachacá Jesucristbeñe ošbuachiyáftaca, er nÿetscanga cánÿiñe mondmëna mo nÿe canÿe entsangcá. ²⁶ Nderado chacmojetëna, tcmojetëna causa ndaye bacna soye ndoñe šmatjama. Pero ndoñe šmatjaleséncia bënana chacmetëna y ndoñe nÿets te chacmondetëna. ²⁷ Ndoñe šmatjaleséncia Satanás ndayánaca tšëngaftangftaca chaomama.

²⁸ Chë yojanatbëbaná chauajbaná atbëbanama y jatrabájama chaontsé;

cachabe cucuátseca tšabe trabajo chaotsóboma, chca, ndayánaca cha chaotsebomnana chë ujabótënga jatšatayama.

²⁹ Bacna palabrenga ndoñe šmattsichamo, pero aínë tšabe palabrenga y nÿa chorsca ujabótama palabrenga, chë inÿe entsángbioye jujabuáchama más Cristcá chamotsemnana, chënga Bëngbe Bëtsábicocana tšabe bendicionënga chamóyëngacñama, chë ndayá chašmojtsëtsësná sóyeca. ³⁰ Ndoñe šmattsama soyënga, Bëngbe Bëtsabe Uámana Espiritu chabongmema. Bëngbe Bëtsá tojama Uámana Espiritu tšëngaftangbe ainaniñe cháumashënguama, y chca, tcmojanainÿnaná chabe entsanga bëtsemnayeca, chë yochjóshjango tescama, Bëngbe Bëtsá chabe entsanga nÿetsca tescama yochjatsebacaye orscama.

³¹ Inÿengbiana bacna juabnénga ainaniñe ndoñe chašmondétsebmna, etonánënga ndoñe chašmondétsemna, ní inÿengftaca ndoñe chacmondetëna. Inÿengbioye ndoñe chašmondétsabuachembuana, inÿengbioye ndoñe šmatjoyánguango y ndaye bacna sóynaca ndoñe šmattsama. ³² Nÿetscángaftaca tšábënga šmochtsemna, nÿetscanga šmochtsenlastemana y šmochjenperdóna, ntšamo Bëngbe Bëtsá, Cristbeyeca tcmojaperdonacá.

Ntšamo yomna Bëngbe Bëtsabe básënga chamotsiyenama

5 ¹ Tšëngaftanga, Bëngbe Bëtsabe bonshana básënga quetsomñecá, nÿa šmochtsentšëna cachacá jtsemnana. ² Šmochtsiyena nÿetsca soyënga bonshánana jtsamëse, ntšamo Cristo šojanababuanÿeshancá;

chca, cha chabe derecho vida jtsobomñama cachcá tojanonýa y bēngbiana tojanóbana. Y ntšamo Cristo tojanmcá, yojamna Bēngbe Bētsábioye jētschuayama, y chabe bominiñe tša tsábá yojtsemna, mo ndaye ora Bēngbe Bētsá oyejuayá jóyēngacñana ndayá tcojóba y altaroca tcojajuinýese, y chē soye botamana jtsonguētšiyana.

³Tšēngaftanga, Bēngbe Bētsábēnga šmōmnēnga, ndoñe quecmátamna shembása o boyabásaftaca bacna soyēnga jtsamana, ni chca játamama jtsejuabnayana y jtsebošana, y chē nýe yapa jésebošana más soyēnga ínýēngbiana jtsebomnama cach ndoñe. Ni chē soyēngama ndoñe šmattsóyebuambnaye. ⁴Bacna soye ndoñe šmattsóyebuambnaye, ni corente ntjenujaboycá, ni nýe ntšámna bacna soye jenbotatšēmbonana cach ndoñe, er chē soyēnga tšēngaftangbiana ndoñe tsábá ntsemnana. Chca játamamna, más tsábá, Bēngbe Bētsá šmochtsantschuanaye. ⁵Er tšēngaftanga ya šmondétatšēmbō, ndocna chē shembása o boyabásaftaca bacna soye amá, ndocna chē nýe chabe bacna juabnéngaca soyēnga jtsamama oyená, o chē nýe más soyēnga ínýēngbiana jtsebomnama bošá y amá (chca jtsayanana chabiana más iuámama soyēnga jtsebomnana, Bēngbe Bētsábioye jatsbobonshánama), chca amēnguentšana ndocná tondaye queochatóyēngacñe ndayá Bēngbe Bētsá chabe entšāngbioye jatsatayama tojašebuachenantsána, Cristo y Bēngbe Bētsabe amēndayoca. ⁶Ndocná chacmondaingñe ndoñe ndegombre tondmēna palabrēngaca, bacna soyēnga chašmotsamama, er chē causa chē uabouana castigo echanjobaye,

ndáyeca Bēngbe Bētsá chábioye ndēyeunanēnga yochjácastigaye. ⁷Chíyeca, chca amēngbe soyēnga tondaye šmattsama.

⁸Tempo tšēngaftanga šmojaniiyena bacna juabnénga jtsebomnēse y bacna soyēnga jtsamēse, mo ibetiñe cuaftsiyencá, pero mora Bēngbe Utabnáftaca cánýiñe mo canýacá bētsemnayeca, chabe soyēnga šmontsetátšēmbō y sempre šmondētsemna cháftaca, chē entšāngbe juabnénga binýnayáftaca. Šmochtsiyena jtsamēse mo chē binýnayabe entšāngcá. ⁹Chē binýnayábeyeca entšānga tsabe soyēnga jtsamana, chē Bēngbe Bētsabe bominiñe tsábá yomna soyēnga, y ndegombre soyēngnaca. ¹⁰Nýa šmochtsentsēna soyēnga jamama, Bēngbe Bētsá oyejuayá chaotsemnana. ¹¹Chē mo ibetiñe cuaftsiyencá oyenēngbe bacna soyēnga tondayama ntoservénana, y tšēngaftanga chca ndoñe šmattsama. Chamna, chēngbioye šmochjínýanýiye chēnga ndoñe tsábá tmonjamama. ¹²Ndegombre, nýe chē ndayá chēnga mo iytēmcá tmojamama jóyebuambayama ya cuantsēuatja; ¹³pero nýetsca soyēnga binýniñe tmojacjá ora jtsopodénana tsábá jinýama ntšamo ndegombre tomncá. Cachcá, ntšamo entšānga tmojamcá chē binýnayá chaojinýanýe ora, echantsopodena jtsotatšēmbuama ntšamo chē soyēnga yomnana; ¹⁴er ndayánaca binýniñe tojtsinýinýena, jtsopodénana jinýama ntšamo ndegombre chē soye tomncá. Cachcá, ntšamo entšānga iytēmcá tmojtsamcá chē binýnayá chaojinýanýe ora, chēnga mochántsetatšēmbō bacna soyēnga imojtsamama. Chíyeca mēntšá jtsichámuana:

Botamana cochjájuaboje, aca ndoñe quecátobena jenomándana, mo canya cuaftsomañcá;
 chë bacna soyënga ama causa,
 Bëngbe Bëtsabe bominiñe mo obanëngcá imomnënguentšana
 šmochtsojuánañe,
 y Cristo acbe juabnënga
 echantsebínnyaye ca.

¹⁵ Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero añe chë chca soyëngama osertanëngcá. ¹⁶ Lempe ntšamo chašmojobenacá nyets tempo tšabe soyënga šmochtsama, er quem tempo entšanga yapa bacna soyënga montsama. ¹⁷ Ntjenojuaboycá ndoñe šmattsama, mo chë ndosertanëngcá. Pero añe bëtscá šmochtsentsëna ndayá Bëngbe Utabná jamama yobošcá chacmósertama. ¹⁸ Ndoñe šmattsótmenaye, er chë soye entšábioye juanatsana jenomándama ndoñe chaondësobenama; chamna, šmochjama Uámana Espíritu sempre y bëtscá tšëngaftange ainaniñe chaotsemándama. ¹⁹ Šmochjenatsëtsaye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espíritu inétsama tšëngaftanga chašmotsobena jacántama soyëngaca; chca, nyets ainánaca Bëngbe Utabnabiama šmochjacántaye y cha šmochtsatschuanaye. ²⁰ Nyets tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

**Ntšamo yomna canye
yebntšënga chamotsemnana**

²¹ Nyetscanga šmochtsenëyeunana, tšëngaftanga Crístbioye puerte šmorrespetánayeca.

²² Shémanga, šmochtsetátšëmbo tšëngaftange boyanga chë yebntšša mándayënga imomnana; y nyets tempo chca šmochtsama, Bëngbe Utabná chašmotsobedecénama. ²³ Er boyá endmëna shembe mandayá y inyëná, ntšamo Cristo chë ošbuáchiyëngbe mandayá y inyëná endmëncá. Cha chënga tojatsebacá y mora cha chënga entsamënda, mo chë bestšaše nyets cuerpo jtsemandayancá; ²⁴ y chca, ntšamo chë ošbuáchiyënga, Cristo chëngbe amëndayá yomnana imotatšëmbcá y chca jtsamana, cachcá, chë shemángnaca entsamna jtsemnana nyetsca soyënguiñe chëngbe boyángaftaca.

²⁵ Boyanga, tšëngaftange shémanga šmochtsababuánjeshana, ntšamo Cristo chábeñe ošbuáchiyënga yojanababuanjeshancá, y chca, chabe derecho vida jtsobomñama cachcá tojanonýa y chëngbiama tojanóbana. ²⁶ Chca tojanma, chënga chabe entšanga y puerte tšábenga jábiamama; y chënga tmojanenabaye ora, tmojaninyanýe Bëngbe Bëtsá chëngbe bacna soyënga tojánabuajuanama, y chabe delante tšábenga chamotsemnana cha tojanmama. Cha chca tojanma, er chënga chábeñe imojtsanošbuaché, chabiama buayenana soyënga tmojanuena ora. ²⁷ Cha chca lempe tojanma, chë ošbuáchiyënga japróntayama corente tšábenga y uámanënga cachabiama chamotsemnana, ndocna bacna soye ndbomnënga, ni ndocna entšá chaondobená jayanama chënga imomna chë ndoñe tšabá tmonjamënga ca, ni ndocna inýe cachca sóyeca. ²⁸ Ntšamo canye boyá cachabe cuerpo endbetsebobonshancá, cachcá cha bontsemna chabe shëmbioye jtsebobonshánana. Nda chabe

shémbyoye tbojtsebobonshana, cachábbyoye jtsenobobonshánana, er chata cánýiñe jtsemnana mo nye canýe entsá cuenta. ²⁹ Er ndocná cachabe cuerpo jtsáboyenjana, ndayá saná janguangoñana y jtsinýenana, ntšamo Cristo bēnga chē ošbuáchiyēngaftaca endbetsamcá; ³⁰ er bēnga nyetscanga cánýiñe mondmēna mo chabe cuerpo cuaftsemncá, y bēnga mo chabe cuerpentša soyēnga cuaftsemncá.

³¹ Ntšamo Bēngbe Bētsabe uabemana palabrenguiñe endayancá: “Chíyeca, boyabása chabe taitá y chabe mamá echanjésabashejuana chabe shémaftaca jenútana, y chē útata mo canýacá bochántsemna ca.” ³² Chē soyēnga josértama puerte totcá comna, pero atše šcuayana, chē soye entsoyebuamná ntšamo Cristo chábeñe ošbuáchiyēngaftaca yomnama. ³³ Pero morna, tšēngaftanga cada ona cachabe shémbyoye chabotsebobonshana, ntšamo cachá iuenobobonshancá, y shema boyábbyoye ndoñe stētšoye chabondēquedá.

6 ¹ Básenga, Bēngbe Utabnáftaca cánýiñe mo canýacá bétsemnayeca, tšēngaftangbe bētsétsangbyoye šmochtsayaunana, er chca jamana tšabá endmēna. ² Moisesbe leyiñe canýe mando endmēna, y chentše endmēna chē Bēngbe Bētsabe natsana mando, ndayentše cha tojašbuachená tšabe bendicionēnga jamama: “Acbe taitá y acbe mamá ndoñe stētšoye catjēftsaquédaye, ³ tšabe vida chacuetsobomñana y quem luarentše baytē chacuetsiyenama.”

⁴ Taitanga, ndoñe šmattsama tšēngaftangbe básenga chauetēnama; más tšabana, chēnga šmochtsabéchaye jtsabuátambayēse y jucácanēse, ntšamo Bēngbe Utabná endbetsabuatambaycá.

⁵ Tšēngaftanga, chē nyets tempo nye ínýabiyama oservēnēnga, tšēngaftangbe nduiñēnga šmochtsayaunana; chca šmochtsama puerte respétoca, bētscá cuedádoca y nyets ainaniñe tšabe juabnéngaca, mo cach Crístbyoye cuaftseservencá. ⁶ Y chca chē nduiñēngbyoye šmochtsaservena, ndoñe nye chēnga chacmojtšénýa ora, mo nda nye entsāngbe delante tšabá joquédama cuaftsebošcá, ndayá Cristbe oservenēngcá, chēnga nyets ainánaca jtsamana ntšamo Bēngbe Bētsá tojtsebošcá. ⁷ Nyetsca trabajotémēnga šmochtsama nyets tšēngaftangbe añémoca, mo Bēngbe Utabnabiyama cuaftsetrabajacá, y ndoñe nye entsāngbiyama. ⁸ Er tšēngaftanga ya šmondétatšēmbo, cada ona, nyets tempo nye ínýabiyama trabajayá o nye cachabiyama trabajayá tomna, ntšamo tšabe soyēnga tojamcá Bēngbe Utabnábiocana yochjójyēngacñe.

⁹ Y tšēngaftanga, ndēmuanýēngbiyama ínýēnga nyets tempo imoservena, cachcá tšabá chēngaftaca šmochjamna, tondayama ntsaúatjatñayēse. Šmochtsenójuabnaye, Bēngbe Utabná chē celoca endmēná, tšēngaftanga y chēngbe mandayá yomnama, y chabiyama nyetscanga cachcá monduámama.

**Ndayá Bēngbe Bētsá entsānga
tojatšatá Satanasbiyama
jenéuyanama**

¹⁰ Y morna, Bēngbe Utabnáftaca cánýiñe mo canýacá jtsemnēse, ainaniñe bēts añemo šmochtsebomna, chē Bēngbe Utabnáobe bēts obenanētšana óbocana añemo.

¹¹ Mo canýe soldadcá, ba soyēnga jtchētjuana chē tmojtšentsjananga ora uayayēngbiyama jenéuyanama, tšēngaftángnaca cachcá, nyetsca chē

Bëngbe Bëtsá cmojatsatá soyéngaca šmochtseprontana jenéuyanama, tšëngaftanga jáingñama Satanás ntšámnaca tojtsama ora, ndoñe chacmondáyëñjanama. ¹² Er bënga ndoñe quemuatenojuerzana cach quem luarentša entsángaftaca jenëyénjanama, ndayá bacna espíritënga mando bomnéngaftaca; bacna espíritënga obenana bomnéngaftaca; y quem luarentša entsanga, chë bacna juabna bomna causa y Bëngbe Bëtsabe soyënga nduabatma causa, mo ibetiñe cuaftsoyencá oyena entsángbioye amëndaye espíritëngaftaca; y chë tsbanánoca luarënguñe imonna y bacna soyënga chaotsebínñnama ama espíritëngaftácnaca. ¹³ Chíyeca, lempe ntšamo Bëngbe Bëtsá cmojatsatacá šmochjóyëngacñe y chë soyënga jtsamëse šmochtsiyena jtseprontánama, mo canye soldado jenéuyanama y jáyëñjanama bëtscá soyënga tojtchëtjácá. Chca šmochjama, chë uayayá Satanás tšëngaftangbioye jáingñama chaojtsama ora ndoñe chacmondáyëñjanama, y jenéuyanama lempe jtsamëse, chašmobená cha jayëñjanama.

¹⁴ Mo canye soldadacá, jabuache jtsanayana y cochaca canye morocho soye jenácochjatsana jtsevalentiana y ndoñe chamondëyëñjanama, tšëngaftángnaca cachcá, ntšamo ndegombre yomncá jtsamëse šmochtsiyena, mo chë jabuache cuaftasnacá, y chë Bëngbe Bëtsabe bominñiñe tšabá yomna soyënga jtsamëse, mo chë morocho soye cochaca cuaftenacochjatscá, chca, Satanás tšëngaftangaftaca tondaye chaondobená jamama. ¹⁵ Mo canye soldadacá jtshëcochëtjuana betesco jobónjuama jtseprontánama, tšëngaftángnaca cachcá, Bëngbe

Bëtsabe obenánaca sempre šmochtseprontana jtsabuayiyayama ntšamo Bëngbe Bëtsá inétsama entsanga tempcá tšabá cháftaca chamotsatsmënama. ¹⁶ Canye soldado escudo jtsebomnana chë uayayabe uajuinñinñana flechëjuangá chabe cuerpiñe ndoñe chaonduámashënguama. Cachcá, tšëngaftanga cmontsamna Jesucristbeñe puerte jtsošbuáchiyana, mo escudo cuaftsebomncá, chca, chë bacna soyënga mandayá Satanás tšëngaftangaftaca tondaye chaondobená jamama, tšëngaftangbe ošbuáchiyana jabuajuánama cha tojtsama ora. ¹⁷ Mo chë soldadacá, canye morocho buchtsanëse tojtabuchëtsëse chabe bestšaše jenéuyanama, tšëngaftángnaca cachcá, sempre šmochjësejuabnaye Bëngbe Bëtsá cmojátsebacama, y chë juabna cmochanjújabuache, mo canye morocho buchtsanëse cuaftsabuchëtsancá. Mo canye soldadacá, chë uayayábioye jayëñjanana, chabe espadéjaca japéliase, cachcá tšëngaftanga, Bëngbe Bëtsabe palabra šmochtsóyebuambnaye Satanás jayëñjanama. Uámana Espiritu jtsamana, tšëngaftanga Bëngbe Bëtsabe palabra chašmotsebomnana. ¹⁸ Nyets tempo chë Uámana Espiritbe uajabuáchenanaca Bëngbe Bëtsáftaca šmochtsencuéntaye, lempe ntšamo Bëngbe Bëtsáftaca jencuéntama yomncá y chábioye jtseimpadánëse. Yejuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuénta ora, y chca šmochjama Bëngbe Bëtsábeñe sempre jtsobátmanëse, y Jesucristbeñe ošbuáchiyëngbiana nyetscangbiana cha šmochtseimpadana.

¹⁹ Atšbiámnaca Bëngbe Bëtsá šmochtseimpadana, atšë

jóyebuambayama chajontsé ora, cha chë buayenana soye chašuyanama; y atše chayobená tondayama ntjatauajcá jóyebuambayana, y chca, entšanga chayinjanýé Jesucristbiana tšabe noticiënga, ndayá chënga tempo ndoñe monjántatšëmbo. ²⁰ Bëngbe Bëtsá šojichmó mo canya chabe cuenta oyeuambnayacá, chë buayénanama entšángbeñe jóyebuambayama, y chca bétsamama, mora atše utamená séntsemna. Atšbiana Bëngbe Bëtsá šmochtseimpadana, atše chayobenama Cristbe buayénanama tondayama ntjatauajcá jóyebuambayana, ntšamo atše jamama šojtsemncá.

Pablo chënga jtadiósoftanama

²¹ Tíquico, Jesucristbeyeca bëngbe bonshana catšata y canýe entšá tšabe palabra bomná, Bëngbe Utabnabe trabajo jamama oservéniñe, ntšamo

atše stsemnama y ndayá stsamama tšëngaftanga chašmotsetatšëmbuama, lempe cmochanjácuntaye. ²² Chama cha tšëngaftangbioye sënjichmó, ntšamo muentše fstsemnama chacméyanama, y tšëngaftanga ainaniñe añemo chašmotsebomnama chaomama.

²³ Atše séntseimpadana Bëngbe Bëtsá chë Taitá y Bëngbe Utabná Jesucristo, chaboma chë Jesucristbeyeca catšátange ainaniñe tšabe ebionana chašmotsebomnama, y Bëngbe Bëtsábioye y ínýengbioye puerte chašmotsababuánýeshanama, Jesucristbeñe tšëngaftangbe ošbuachiyánaca; ²⁴ y chaboma, chë Bëngbe Utabná Jesucristbioye bëts bonshanánaca imobobonshanéngbeñe tšabe bendicionënga chaotsemnama, canýe ndocná yondobena jatrócama bonshanánaca.